

**Dewan Negara: Rang Undang-Undang Perubatan Tradisional Dan Komplementari
2012 Diluluskan
Bernama
3 Disember, 2012**

KUALA LUMPUR, 3 Dis (Bernama) -- Rang Undang-Undang Perubatan Tradisional dan Komplementari 2012, yang mewajibkan semua pengamal perubatan tradisional mendaftar dengan Majlis Perubatan Tradisional dan Komplementari yang akan ditubuhkan, diluluskan Dewan Negara pada Isnin.

Timbalan Menteri Kesihatan Datuk Rosnah Abdul Rashid Shirlin ketika menggulung perbahasan rang undang-undang itu berkata gelaran doktor hanya akan diberikan kepada pengamal perubatan tradisional dan komplementari berkelayakan dengan lima tahun ijazah asas, selain memenuhi kelayakan yang akan ditentukan oleh majlis kelak.

"Rang undang-undang ini tidak membenarkan individu yang hanya mengikuti kursus pendek untuk menggunakan gelaran doktor, contohnya Dr (H) untuk pengamal Homeopathy," katanya.

Beliau berkata terdapat 13,811 pengamal perubatan tradisional dan komplementari yang berdaftar dengan kementerian itu di seluruh negara setakat ini.

Mengenai perubatan Islam atau Rukyah, beliau berkata Kementerian Kesihatan telah menerbitkan buku 'Garis Panduan dalam Perubatan Islam' yang perlu diikuti oleh pengamalnya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=713564>